

## 《旅行》

郭嘉茵

場景 1：機艙

阿晴：「好重呀 d 行李！」

阿露：「喂！你幫我地擺上去吖！」

阿火：「我係你工人呀，做乜要幫你！」

阿露：「你吖……」

阿順：「等我擺啦！」

阿晴：「唔該晒阿順！」

阿俊：「老婆，你有無後悔嫁俾我呀？」

阿詩：「做咩無端端咁講呀老公？哦…你係咪想話後悔娶左我！哼！」

阿俊：「唔係吖，老婆仔，我想話，我娶到你，我真係世界上最最最幸福既人！」

阿詩：「好肉麻吖你，嘻嘻，不過我鍾意！」

阿俊：「老婆呀，對唔住，依家我只夠錢帶你地台灣度蜜月，帶唔到你去……」

阿詩：「夠喇，老公，我去邊度都無所謂，最緊要我地可以係埋一齊！」

阿俊：「我地一定會白頭到老，今生今世都唔會分開，唔係，每生每世都係至真！」

阿詩：「嘻嘻，上天對我真係好，比個咁好既老公我！老公，我錫晒你！」，

阿俊：「嗯，老婆仔，我應承你，以後老公我一定會俾心機做野！唔會再令你受苦！」

阿詩：「老公豬，咁我都應承你，從今以後，我要為老公你改我 d 臭脾氣！」

阿露：「羨慕死人喇！你睇下人地幾恩愛！」

阿晴：「喂，細聲 d 啦你，俾人聽到瘀死呀！」

阿露：「得喇！你睇下，人地真係好幸福呀，可以搵到一個咁愛自己既人，如果……」

阿火：「如果咩呀？男人婆！有人肯要你先算啦！發夢無咁早！」

阿晴：「阿火呀！你唔好咁口臭啦！」

阿露：「你係咪想嚟交嗌呀？」

阿華：「好煩呀你地兩個，你地再嘈，全機人都望住我地喇！」

阿順：「喂呀，我地之前講過今次去玩要開開心心架麻，依家咁快又嘈！」

阿晴：「係啦！我地咁辛苦先考完試，難得有機會一齊去玩，唔好咁掃興成日嗌交啦！大家好朋友吖嘛！」

阿露：「咩喎，係佢嚟交嗌先既！」

阿火：「好好好，我唔同你嘈，好男不與惡女鬥！」

空姐：「先生，請問你想飲 d 咩呀？」

阿業：「……」

空姐：「先生！先生！」

阿業：「嗯，咩事呀？」

空姐：「係，先生，請問你想飲 d 咩呀？」

阿業：「哦，俾杯水我得喇！」

阿露：「阿晴呀，你望下個男人幾怪！成日揸住幅相，頭耷耷眼濕濕咁，連個空姐問佢飲咩佢都唔應人！」

阿業：「做咩呀男人婆？對中年男人有興趣吖？」

阿露：「神經病！」

阿晴：「可能人地心情唔好呢！都係唔好理人地咁多喇！」

## 場景 2：公寓

阿晴：「嘩！有甲 X 呀！」

阿露：「咦……乜呢度咁污糟架！邊個話住住呢間架，又舊又殘！」

阿火：「阿姐，你羅幾錢出黎呀？有得你住仲係度嫌三嫌四！」

阿順：「算啦，算啦，我地留番多 d 錢去玩仲好過啦！」

阿俊：「呢度 d 人都幾無公德心架喎，擺晒 d 野係度，真係唔好彩火燭都唔知點算！」

阿詩：「由佢啦，都唔關我地事！快 d 行啦老公！」

（第二天）

阿華：「8:00.....8:30.....8:40.....8:45.....這麼久還不下來！」

阿順：「再等一會啦，女仔係要耐 d 架啦！」

阿華：「我再也等不了！一定要上去捉她們下來！」

阿順：「一係我上去叫佢地快 d 啦，好唔好？」

阿火：「唔等喇，我同 a 走先，你自己係度慢慢等個兩隻醜八怪啦！」

阿順：「喂喂喂，佢地黎喇！等埋啦！」

阿露：「邊個話我地醜八怪呀？」

阿火：「你地兩個搞咩呀？我地以為你地跌左落屎坑呀！」

阿露：「你今日擦左牙未呀？把口咁鬼臭！」

阿晴：「sor 呀，頭先……」

阿露：「阿晴，小心！」

店主：「行開！唔好阻住晒！」

阿順：「阿晴，你有無事呀？」

阿火：「你盲架？前面有人都夾硬撞埋黎！唔該你就小心 d 啦！」

店主：「你唔識避開架！鬼叫你地塞住晒係度，我依家行都無位行呀！」

阿露：「嘩，你姓賴架！依家你即係擺明焗我地細路仔姐！」

店主：「都費鬼事同你地講！哼！有錢咪去大酒店囉，走吖笨！」

阿晴：「算啦！算啦！我無事呀！」

阿華：「係啦！唔好同 d 野蠻人嘈喇，阿晴都無事，我地行喇！」

（他們離開了公寓）

阿順：「我地依家去邊呀？」

阿華：「我地今日去 xxx，影完相，再去 xxx 食盡台灣美食，好唔好？」

阿晴：「好吖！」

阿詩：「老公呀，不如叫人地幫我地影張相！」

阿俊：「唔…不如叫 0 個幾個後生仔！」

阿詩：「唔該！可唔可以幫我地影張相呀？」

阿晴：「嗯，無問題！」

阿露：「咦？係你地兩個吖！」

阿俊：「老婆，你地識架？」

阿露：「唔係吖！不過我認得你地，我地同一班機架！你地黎呢度玩呀？」

阿詩：「我地黎度蜜月！咁你地呢？成班朋友黎玩呀？」

阿晴：「係呀！我地考完試，咪一齊黎玩囉！」

阿露：「哦，你地岩岩新婚！你先生對你好好呀，你真係幸福！」

阿詩：「嘻嘻，我老公真係對我好好架！」

阿俊：「唉吔，老婆，你唔好同人地講埋 d 咁既野啦！」

阿詩：「點解啱？同人分享我 d 幸福唔好咩？」

阿俊：「係喇！係喇！我地行個邊喇，拜拜！」

阿露：「拜拜！」

阿晴：「拜拜！」

阿詩：「下次有機會再見啦！拜拜！」

（他們兩班人分開了）

阿業：「陳生！陳生！有無時間坐低傾兩句呀？」

陳生：「有咩事同我秘書講，我依家趕時間！」

阿業：「陳生，唔會阻你好多時間架咋！」

保鑣：「你走啦！陳生趕時間呀！」

阿業：「陳生！陳生！你做下好心啦！無左你，我間公司死梗，我唔食，班伙記都要開飯！」

陳生：「好心？你估我依家開樂善堂呀！我幫你，咁邊個幫我呀？」

保鑣：「都話左陳生趕時間咯，唔好阻住啦！行開！」

阿業：「陳生！陳生！求下你…求下你吖……」

阿詩：「老公，你睇下，個男人想同人傾生意，人地騷都唔騷佢喎！」

阿業：「唉……依家搵食真係唔容易！」

阿詩：「嗯，好彩我有老公養〇者！」

阿俊：「你呀！成日都指意我，我死左你都唔知點算！」

阿詩：「唔準講個死字呀！」

阿業：「係係係！老婆，我地行去個邊喇！」

阿詩：「嗯！」

（阿業接到伙記的電話）

伙記：「老細！老細！你依家係邊呀？搵唔搵到陳生佢呀？」

阿業：「唔得……我無用！我無用！」

伙記：「老細！你講咩呀？我地好多街數都未找，d 人追到上黎喇！我地點算

呀？」

阿業：「你地走啦…你地走啦……」

（阿業關了電話）

伙記：「喂？老細！喂？喂？」

阿火：「喂！男人婆，你個夢中情人呀！」

阿露：「發神經！」

阿晴：「係喎！阿露，你睇下，真係飛機上面 0 個個男人呀！」

阿露：「噃，他好似成日都係一個人，孤伶伶咁……」

阿華：「佢似生意失敗多 d 喎！」

阿順：「咁佢又真係好似有很多煩惱咁既，唉，總之家家有本難唸的經啦！」

### 場景 3：食店

阿詩：「老公，我好肚餓！我地食得野未呀？」

阿俊：「唉吔，你肚餓做咩唔出聲呀！」

阿詩：「你做咩咁大聲喎，我肚餓你都唔知，你根本就一 d 都唔重視我！」

阿俊：「係係係，都係老公我唔 0 岩，老婆仔你想去邊度食呀？」

阿詩：「是但啦！我就黎暈低喇！」

阿俊：「咁就去前面間野食啦！」

阿露：「快 d 叫野食啦，好肚餓吖！」

阿火：「好貴呀 d 野，點叫，你請呀？」

阿露：「咁你又叫我地入呢間！」

阿火：「叫你入就入架喇？我叫你去死，你唔好去死！」

阿華：「好喇！唔好吵啦…我叫啦……WAITER，唔該我要……」

阿晴：「唔好叫埋 d 辣野食啦！阿順唔食得辣架！」

阿順：「無所謂啦，少少辣唔緊要，你地想食就叫啦，唔使就我。」

阿晴：「咩呀，你上次食完辣就……」

阿火：「收聲啦你，阿順都話無所謂，唔辣邊好食！」

（侍應 1 走過）

阿晴：「做咩事呀？」

阿火：「你有無搞錯呀？成壺滾水淋落黎！」

侍應 1：「對唔住呀！先生，對唔住！我幫你抹番……我幫你抹番乾淨佢咁！」

阿火：「依家濕晒喇，點抹呀？」

阿露：「咪扮野啦你，整濕少少就係度鬼晒咁嘈！」

阿晴：「係啦！都係濕左少少啫，你唔好咁惡，發咁大脾氣啦！」

阿詩：「老公呀！你睇下！個侍應好慘呀！俾個後生仔鬧到狗血淋頭！」

阿俊：「唉…做呢行係咁架啦，咁鬼佢咁唔小心咩！」

阿詩：「係人都會唔小心架啦，佢使唔使咁惡呀？人地都係打份工啫！」

阿俊：「係係係，老婆最岩！」



侍應 2：「先生！先生！小心 d 呀！你有無事呀？」

阿業：「我…我無…無事……」

（阿業飲醉酒）

阿詩：「你行路有無帶眼架？想搏懵呀？」

阿業：「唔…唔好意思……」

阿詩：「你個死色狼吖！」

阿俊：「算啦！老婆仔，人地都係唔小心措到你少少啫！」

（阿業走去）

阿詩：「咩少少呀？喂，你唔好走呀，老公呀！你唔好俾佢走呀，我要報警！」

阿俊：「坐低啦你，個個都望住我地喇！」

阿詩：「你做咩咁惡啫？你老婆我依家俾人烔呀，你一句聲都唔出！」

阿俊：「無惡呀！老婆仔有無事呀？」

阿詩：「好痛呀我！」

阿俊：「老公錫番！老公錫番！」

侍應 3：「嘩，好彩你頭先壺水淋落個後生仔度咋，俾佢話一兩句，如果你整到呢個女人，你實……」

侍應 2：「唉，真係寧得罪小人，都莫得罪女人！」

阿晴：「喂喂，我地不如番酒店喇，阿順佢唔舒服呀！」

阿華：「唔係吖麻，咁早，我都未玩夠！」

阿火：「係囉，阿順佢咩唔舒服呀？求其食粒藥咪得囉！」

阿晴：「阿順！你點呀？係咪好辛苦呀？」

阿露：「你地兩個係人唔係呀？阿順咁辛苦，你地兩個係咪玩少陣都唔得呀？」

阿火：「妖，阿華我地行喇，咪鬼理個男人婆！」

阿晴：「喂…喂喂…你地走左我地點算呀？」

阿華：「阿火，我地都係同埋佢地番去啦不如！」

阿火：「唉，行啦行啦，好鬼煩呀！」

阿順：「唔好意思呀，都係我！係我搞到大家咁唔開心！」

阿晴：「阿順，你唔好咁講啦！大家好朋友黎架嘛！」

阿露：「係啦！唔舒服你都唔想架嘛！」

阿順：「唔好意思……」

阿火：「行得未呀你地，仲講咁多！」

阿俊：「老婆你唔好再買喇，你已經買左好多！」

阿詩：「唔好嘈啦，老公！」

阿俊：「……」

阿詩：「老公呀，你睇下呢件好唔好？」

阿俊：「夠喇，老婆，樣樣你都話買，你估你老公我有好多錢呀？」

阿詩：「哼！我買少少野你就嫌三嫌四！」

阿俊：「多多錢都唔夠你買呀！」

阿詩：「根本你就係緊張 d 錢仲多過我！」

阿俊：「喂！你唔好係度打橫黎講嘞，明明係你自己大使，仲係度發爛渣！」

阿詩：「你話我發爛渣？係呀，我係咁唔講道理架喇，你唔忍得就唔好忍啦！」

阿俊：「好吖！你估我好想忍你 d 臭脾氣架！」

阿詩：「嗚……林家俊，你好野！你根本就唔愛我！你唔愛我當初就唔好娶我！」

阿俊：「我唔愛你？我唔愛你就唔使嘅錢同你黎呢度！」

阿詩：「嘅錢！你依家即係話我嘅晒你 d 錢啦！」

阿俊：「你好喇嘞！你唔好再咁無理取鬧好無？」

阿詩：「好！既然你咁睇我唔順眼既，咁我咪走囉，唔使俾你見到我！你唔使再忍我喇，你滿意啦！」

（阿詩怒氣沖沖地離去，阿俊卻跟隨其後）

阿詩：「走呀你，我唔想見到你！你唔好再跟住我呀！」

#### 場景 4：大堂

彤彤：「喂？」

阿業：「喂？係咪彤彤呀？」

彤彤：「係呀，Daddy，彤彤好掛住你呀！」

阿業：「Daddy 唔係度，彤彤有無柔皮，有無聽媽咪話呀？」

彤彤：「梗係有啦！彤彤不之幾乖，Daddy，你做咩仲唔番黎呀？」

阿業：「…唔……彤彤，你今年幾多歲呀？」

彤彤：「八歲喇！Daddy，你做咩咁問呀？」

阿業：「唔…Daddy 有 d 野做，唔可以番黎住！」

彤彤：「吓？Daddy，你係咪黷左彤彤呀？唔好唔要彤彤呀，我會聽話，唔好再百厭架喇！」

阿業：「傻豬黎既，Daddy 點會黷彤彤，彤彤係 Daddy 心目中係最重要架麻！」

彤彤：「但點解 Daddy 你咁耐都仲唔番黎呀？」

阿業：「唔……有好多野 Daddy 解釋唔到俾你聽，Daddy 要去一個好遠…好遠既地方，可能好耐都唔會返黎，不過彤彤依家大個女喇，要學識照顧自己，千祈唔好曳，激親媽咪，知唔知道呀？」

彤彤：「唔知，唔知道呀！嗚……Daddy 你要快 d 番黎，唔好 X 低彤彤呀！」

阿業：「彤彤乖，唔好扭計啦，Daddy 要走喇，不過無論 Daddy 去到邊，Daddy 都會……都會好掛住彤彤！」

阿君：「邊個黎架？彤彤，做咩事喊呀？」

彤彤：「嗚…嗚……係 Daddy 呀！」

（媽媽阿君一手搶去彤彤的電話）

阿君：「你搞咩呀？你知唔知依家個女喊晒呀？」

阿業：「老婆，對唔住…對唔住……」

阿君：「徐偉業！你究竟同個女講左 d 乜呀？」

彤彤：「Daddy 話要去一個好遠既地方，好耐都唔會返黎，嗚……Daddy 佢唔要彤彤喇！」

阿君：「你…你講咩去好遠既地方呀？」

阿業：「……對唔住…，老婆，我對你唔住！我走喇，你要好好照顧我地個女！」

阿君：「喂！你唔好走呀！你講清楚先好走！」

阿業：「對唔住，我走喇！」

阿君：「喂？徐偉業！喂？你同我番黎呀…老公你應下我啦，唔好嚇我！」

阿華：「你地聽唔聽到有人啞呀？」

阿順：「好似有人啞火燭喎！」

阿露：「死喇！好似有好大陣煙味呀！」

（他們看見中年人阿業呆坐一旁，一動也不動）

阿露：「喂！走火警呀！樓下個鐘都響曬啦，你仲唔走？」

阿業：「我唔死都無用！」

阿晴：「點會呀？你 d 屋企人呢？你死左佢地點算呀？」

阿華：「唔好講咁多喇！的埋佢走先算啦！」

阿業：「我唔走呀！你地俾我死啦！」

阿順：「要走喇！再唔走黎唔切架喇！」

阿業：「放開我呀！我死唔關你地事！」

阿火：「頂！真係火都黎埋！有咩事一定要死呀？你係咪男人黎架，有咩事解決唔到，你有無諗過你老婆同 d 子女架？你係死就依家跳落去！」

阿業：「我都唔想，我無得揀，係我害左佢地！」

阿露：「唉吔，d 火燒到埋黎喇！」

阿火：「行啦！你依家真係害左我地呀，咩無得揀？出得番去就有得揀啦！」

阿詩：「我唔想死呀老公！」

阿俊：「我地實無事，實可以出得番去！」

阿詩：「啊……………」

阿俊：「小心呀老婆！」

（阿俊為了救阿詩，被撞傷）

阿詩：「老公……老公，你醒下啦，唔好嚇我呀！救命吖！救命吖！」

阿華：「點呀你？」

阿詩：「我老公……」

阿火：「越黎越大火喇！我地扶埋個男人出去先算啦！」

阿詩：「唔該呀…唔該呀！」

阿露：「唔好講咁多喇！行喇！」

## 場景 5：醫院

阿俊：「老婆，你唔好攞得我咁實啦，我透唔到氣呀！」

阿詩：「嗚……對唔住呀老公，一日最衰都係我，係我累到你受傷，如果唔係因為我……」

阿俊：「傻豬黎既，你係我老婆黎架嘛，為左你，我命都可以唔要！」

阿詩：「老公，你真係好傻……如果你唔係度，我都唔知點算！」

阿俊：「但係如果無左老婆你，我生存落去都無意思！」

阿詩：「老公…老公……我唔值得你對我咁好！」

阿俊：「唔準咁講，我話值得就值得！」

阿順：「醫生，醫生，我地個朋友點呀？」

醫生：「佢失血過多……」

阿華：「咩話？咁嚴重？有無生命危險呀？」

醫生：「我地已經盡左力……」

阿火：「……醫生，醫生，你要救佢地呀，救佢地呀，佢地唔可以死架！」

阿露：「邊個咒我地死！」

阿順：「咦，阿露阿晴，點解你地……」

阿露：「我地不之幾福大命大呀，點會有事吖！」

阿華：「醫生，咁即係點呀？」

醫生：「唉…我都未講完，我係話佢地失血過多，不過經過搶救之後已經無事，但係最好都係留院觀察一晚！」

阿火：「醫生你講 d 唔講 d，真係俾你玩死！」

阿晴：「阿火，你喊呀？」

阿火：「無呀……邊到有嗶！」

阿露：「你唔係呀嘛，男仔之家學人喊……」

阿火：「咩呀……」

阿華：「唔好死撐啦你！係咪認囉！」

阿順：「你地唔好笑阿火啦！阿火不之幾擔心你地呀！」

阿露：「車！佢？佢都會關心我地架咩？」

阿火：「喂，男人婆！你唔好講到我好似無人性咁喎！」

阿順：「咦！頭先個男人係個邊呀！」

阿火：「點呀你！依家仲想唔想死呀？」

阿露：「收下把口啦你！」

阿晴：「唔好意思呀先生，佢把口係咁架喇，唔好怪佢！」

阿業：「唔緊要…唔緊要，都係全靠呢位後生仔，我先唔會咁傻走去死！」

阿順：「其實有咩野解決唔到要死吖，你有勇氣去死，點解無勇氣去解決問題啲，你死左你 d 屋企人實傷心死！」

阿業：「嗯嗯，我真係好自私，完全都無諗過老婆同個女！」

阿露：「大把機會啦！依家補救仲黎得切架！」

阿業：「無用架！我老婆話我事業心重，成日掛住做野，唔理屋企，佢一早帶埋個女走左喇！」

阿華：「d 女人係咁架啦！佢走都係想你緊佢多 d 啲！」

阿露：「係呀！女人緊係想個老公錫佢同關心佢多 d 架啦！」

阿晴：「你千祈唔好放棄呀！」

阿業：「多謝你地…真係好多謝你地，你地咁細個就咁識諗，相比我……我真



係好無用！」

阿火：「咁你又唔好咁講！依家諗通左咪得囉！」

### 場景 6：機艙

（阿業望著全家福，微笑起來）

阿露：「喂喂，你做咩陰陰嘴笑呀？」

阿業：「咦，係你地呀！」

阿晴：「呢個就係你個女吖？好得意呀！」

阿火：「你個老婆都幾靚喎！」

阿晴：「喂呀！講野正經 d 啦你！」

阿業：「哈，唔緊要，不過我老婆真係幾靚架！」

阿露：「你好似開心左好多喎！」

阿業：「嗯，我諗通左，為左老婆同個女，我唔會再逃避，我會積極咁去面對！」

阿詩：「老公呀，你個頭仲無痛呀？」

阿俊：「少少啦！」

空姐：「小姐，請問你要雞扒飯定牛肉飯呀？」

阿詩：「雞扒飯吖唔該！」

阿俊：「我都要雞扒飯吖唔該！」

空姐：「唔好意思呀先生，小姐要既雞扒飯已經係最後一份喇！」

阿俊：「咁我要牛肉飯啦！」

空姐：「噃，真係唔好意思呀先生！」

阿俊：「唔緊要……」

（空姐行開了）

阿詩：「係喎，老公你唔可以食牛架，食牛你個傷口會發炎架！」

阿俊：「一次半次唔緊要啦！」

阿詩：「梗係唔得啦……不如我同你掉轉啦老公！」

阿俊：「唔得！你至憎食牛架喎，次次食親牛都……」

阿詩：「你先最緊要呀，等陣真係發炎咁點算呀？老公你再有事，我都唔知點算！」

阿俊：「傻豬黎既，我唔會俾自己有事，我要保護你，照顧你一生一世！」

阿詩：「嗚……老公你好好呀，我咁自私你都對我咁好！」

阿露：「阿晴呀，你覺唔覺得好凍呀？」

阿晴：「噃，我都覺呀！」

阿火：「喂，羅住啦！」

阿露：「下？」

阿順：「咦？阿火做咩羅張氈番黎既？」

阿華：「佢羅俾佢地兩個架！嘩！阿火你轉死性呀？」

阿火：「咩呀……我乜嬲都對大家咁好架啦！」

阿晴：「唔該阿火！」

阿露：「……唔該！」

全劇完